

Hasil kejayaan raih emas pada Sukan SEA di Myanmar

Atlet IPT dapat durian runtuh



MENTERI Pendidikan II, Idris Jusoh mengangkat Trofi SUKIPT 2014 semasa Majlis Pelancaran SUKIPT 2014 di Dewan Za'ba Kementerian Pendidikan Malaysia, Putrajaya, semalam.

Oleh ABDUL HAFIZ AHMAD

hafiz.ahmad@utusan.com.my

PUTRAJAYA - Penuntut institusi pengajian tinggi (IPT) yang menyumbangkan 24 daripada 43 pingat emas atau 56 peratus yang dimenangi Malaysia dalam Sukan SEA XXVII di Nay Pyi Taw, bakal mendapat 'durian runtuh' sebanyak RM5,000 setiap satunya, daripada skim insentif Kementerian Pendidikan.

Mereka ialah Muhammad Irfan Shamsuddin, Nauraj Singh Randhawa dan Pandelela Rinong Pang dari Universiti Malaya bagi olahraga dan terjun; Lim Chee Wei dari Universiti Sains Malaysia bagi dua emas karate, Cheong Jun Hoong (Universiti Putra Malaysia - UPM) dengan dua emas terjun serta sebahagian besar pemain skuad hoki wanita (UPM dan Universiti Teknologi Mara).

Menteri Pendidikan II, Datuk Seri Idris Jusoh berkata, pencapaian itu cukup membanggakan apatah lagi 32 peratus atau 186 daripada 582

atlet negara pada temasya dwitahunan itu datangnya dari IPT, berbanding sasaran awal kementerian, hanya 30 peratus.

"Mereka membuktikan tetap mampu cemerlang dalam sukan antarabangsa biarpun sebagai penuntut IPT. Daripada 32 peratus atlet negara dari IPT ini, mereka berjaya menyumbangkan 53 peratus pingat Malaysia dalam Sukan SEA," katanya pada majlis pelancaran Sukan IPT (SukiPT) Kedua di sini, semalam.

Kata beliau, atlet IPT turut menyumbangkan 19 daripada 38 pingat perak atau 50 peratus dan 40 daripada 76 gangsa atau 53 peratus dengan secara keseluruhannya, 83 daripada 157 pingat kontinjen negara yang mewakili 53 peratus di Nay Pyi Taw.

"Insentif bagi Sukan Asia dan Komanwel tahun depan pula ditetapkan sebanyak RM15,000 bagi emas, RM10,000 perak dan RM7,000 gangsa, sementara bagi Sukan Olimpik RM25,000 (emas), RM15,000 (perak) dan RM10,000

(gangsa)," katanya.

Sementara itu, SukiPT yang dilancarkan semalam dengan kos pernganjuran RM3 juta, bakal berlangsung dari 3 hingga 16 Februari tahun depan di UiTM, Shah Alam dan akan dirasmikan oleh Timbalan Perdana Menteri yang juga Menteri Pendidikan, Tan Sri Muhyiddin Yassin.

"SukiPT kali kedua ini akan melibatkan 110 kontinjen (20 IPT awam, 50 IPT swasta, 12 politeknik negeri, 10 kolej komuniti negeri, 14 institusi pendidikan guru dan satu matrikulasi), disertai 8,000 atlet, 2,500 pegawai, 1,500 sukarelawan di 20 gelanggang pertandingan yang mempertandingkan 251 pingat emas," katanya.

Dua puluh empat jenis sukan pada SukiPT 2014 ini ialah bola tampar pantai, catur, hoki, boling padang, memanah, menembak, renang, sepaktakraw, pencak silat, tennis, boling, woodball, badminton, bola jaring, bola tampar, judo, karate, lawan pedang, olahraga, petanque, ragbi, sofbol, skuasy dan taekwondo.